

後疊山高至數仞然後規模壯麗氣象攸芋
耽耽翼翼巍然煥然稱其爲泮宮矣

朱文宗臨廉校士碑

王

失名

皇帝踐祚三十年道化翔洽人文蔚起海隅
日出之邦咸興於禮義蓋廣勵學宮釐正文
體所從來遠矣顧復慎重督學憲臣之選非
海內宗工鉅匠爲廷臣所推讓者不輕授是
任謂多士射也爾爲鵠謂多士影也爾爲標
源之弗清流之何有則慎簡才望之臣奉敕

以往而公實來粵粵固僻壤也雖聖化漸涵
靡不滲漉夫亦惟是省會之區彬彬稱盛乃
日南海北之邦龍蛇之所窟豺狼之所嗥士
生其間克自振拔此亦鮮矣是故士以不見
拔益怠以益怠益不見拔故論興文於粵雷
廉爲最難且以其俗之鄙也與才之乏也督
學使者往往及雷而止累三十年所無過廉
一步者每考較海北廉之士裹糧而之雷計
其費馬四蹄錢千夫十趾錢千糗糧僦賃稱

是又地接四衢萑苻劫掠之憂百倍是士以
故莫樂往卽初學後生窘于道里費或中止
焉故論校文於雷廉廉尤爲最急合廉之膠
士數請於郡邑大夫願一借公玉趾以光敝
邑且自今弛於負擔也時郡侯先意從史甚
力而公實式臨之士無賢不肖莫不欣躍者
按廉也先行誼次文學數日而畢官不費供
億士不煩資斧賢者進不肖者退各稱其情
而止士無進退莫不激勸也者咸謂廉寒谷

也公實陽春而噓之廉士稿禾也公爲時雨
而濡之夫寧爲多士之幸實天之大有造於
茲土也今以往督學使者尚無廢公之舊以
鄙彝此一方民也惟公廉之士其克自振拔
蜚英騰茂以與上國齒也亦惟公公行則又
進多士而勗之曰而不聞還珠之故蹟乎還
珠使君吾鄉之望也毋寧使人謂使君還照
乘者而我不得還照千里者乎茲起雷而來
非二三子是爲天子之命是亟嘉與二三子

維新也毋自謏棄實僻處此俾後之繼今永
永無斃不然此實無元珠而微微象罔之索
其何得焉諸士咸奮用鑄堅珉謀諸王子王
子紀其事而歌之歌曰百粵之區廉居偏顛
蒙未啟淳朴全辟之羸蚌未剖先明月照乘
光闇然亦有大匠來自天斧藻琢磨工力完
雨粟鬼哭攬奎纏陸離燦兮賁山川固陋一
掃文明還珠璣玳瑁羅滿筵煌煌紫芝產東
邊公未至止兆已前蒸雲映日五色鮮枝鏤

莖刻秀且妍更有鬢宮竝蒂蓮千叢似束華
欲燃恍如宮錦被瀛仙交加頡頏何翩翩桃
李公門擬竝肩兩岐麥秀共稱賢冠山峩峩
永不騫珠海洋洋永不燁公來作祖文運旋
山高海深名共傳從今比屋歌且絃率由舊
章以無愆朱公諱燮元號衡岳浙江山陰人
壬辰進士萬曆三十一年歲次癸卯春二月
吉日

還珠亭記

李

駿

明僉事

合浦古郡也今爲縣隸廉州府舊有亭曰還珠蓋以表孟嘗之異政也亭在今府治東北還珠嶺下屢經兵火漫不可識景泰五年郡守江右李君遜始構地於稍南而作新之旣建亭其中又立祠其後工力費用皆措置有方民悉欣然從事無有怨咎經始於是歲之冬落成於明年之夏適予按部斯郡遂以記請予惟州郡守吏秩不貴於諸侯而勢等爾諸侯始封其地大者不過五百里小者僅百

里而已今郡地至於千里州猶不下數百里俗之登耗政之巨細金錢之出納教化之張弛皆懸於長吏之賢否以故擇吏者慎之方漢室既東政尚督責當時之爲郡者率皆劔於貨寶專務誅求由是含胎孕珠之蚌亦皆苦之而徙於他境爲政之弊一至於此尚何望其有所建明哉獨孟君之來也去其害而興其利通其政而和其民禮樂教化之具畢修愆伏凌苦之災不降由是人無瘡扎物無